



PATRIARCHATVS ANTIOCHENVS SIVE ORIENTIS.

LIBER VNDECIMVS.



Rientis nomine Prouincias illas veteres Romani designarunt, quæ præ cæteris totius Imperij maxime Orientales erant; quæque in ciuilibus à Comite Orientis regebantur, de quo hæc Notitia Imperij.

Sub dispositione Comitis Orientis, Prouincia infra scripta.

Palæstina, Phœnice, Syria, Cyprus, Cilicia prima, Palæstina secunda, Palæstina Salutaris, Phœnice Libani, Euphratensis, Syria Salutaris, Osrhoëna, Mesopotamia, Cilicia secunda, Isauria, Arabia.

Antiocheno Patriarchæ subiectas descripturi, tres Palæstinas omittimus, cum huic ablatae fuerint, & pro Diocesi Hierosolymitana assignatae. At quod ad cæterarum Notitiam pertinet, eas tot numero primis temporibus hacce in Regione non fuisse imprimis ex Ptolemæo videtur obseruandum, sed quinque tantum, nimirum Ciliciam, Syriam, Mesopotamiam, Arabiam & Cyprus, ex quibus postea duodecim factæ sunt. Vna prius Cilicia fuit, quæ tandem in duas diuisa est, nec non intra suos limites Isauriæ ortum dedit. Item vnica Syria, quæ postea diuisa est in Syriam primam, Syriam Salutarem, vtramque Phœniciam, & Euphratensem seu Comagenam; sicut Osrhoëna ex Mesopotamiæ parte constituta dicitur: quibus Arabia & Cyprus additæ duodenarium numerum conficiunt. Singularum autem termini sic describi possunt.

Isauria, quæ olim erat pars Ciliciæ, habet ab Occasu Pamphyliam, à Septentrione Lycaoniam & Taurum montem, ab Ortum Ciliciam primam, & mare Cyprium à Meridie.

Cilicia prima Campestris & Trachæa dicta terminatur ab Occasu Isauria, à Septentrione Tauro monte, ab Ortum altera Cilicia, à Meridie mari Cyprio.

Ciliciæ secundæ limites sunt ab Occasu Thrachæa, à Septentrione Taurus, ab Ortum Comagena, & à Meridie sinus Issicus.

Euphratensis seu Syria Comagena ad Euphratem porrigitur, habetque

Nn ij

I.
ORIENTIS DE-
SCRIPTIO ET
DIVISIO.

a Ptolem. lib. 5.
cap. 8. 17. &c.